

Angkut 10 tan sampah

Yusmizal Dolah Aling
yusmizal@hmetro.com.my

■ Pelbagai pihak gotong-royong selama sembilan jam bersih rumah warga emas

Ampang

Sebanyak 10 tan sampah yang 'terperap' di rumah dua tingkat didiami warga emas, Zaidah Mansur, 67, sejak tujuh tahun lalu dikeluarkan pelbagai pihak dalam tempoh lebih sembilan jam, semalam.

Kerja murni dilaksanakan itu hasil bantuan Persatuan Pengguna Islam Malaysia (PPIM), Majlis Perbandaran Ampang Jaya (MPAJ), sukarelawan Universiti Putra Malaysia (UPM) dan Universiti Islam Antarabangsa Malaysia (UIAM), Muslimat PAS Cawangan Flat Taman Kosas serta penduduk setempat.

Bermula jam 8.30 pagi, Zaidah sebelum itu enggan membuka pintu rumahnya dan membenarkan sukarelawan masuk namun selepas dipujuk dia bersetuju rumahnya dikemas.

Antara barangan dikeluarkan daripada rumahnya termasuk perabot, pakaian lama, kertas, plastik, peralatan yang rosak dibawa menggunakan lori MPAJ dan syarikat, Fateh Construction & Services Sdn Bhd.

Selain sukarelawan, gotong-royong berkenaan turut disertai Ketua Aktivist PPIM Datuk Nadzim Johan, Ketua

Seksyen Pembangunan Kendiri dan Akademik, UPM, Rafidah Sadarudin dan sukarelawan tempatan.

Ketika rumahnya dibersihkan, Zaidah juga menerima kejutan daripada rakan-rannya dari Universiti Teknologi MARA yang sama-sama menuntut pada 1978.

Gotong-royong itu diakhiri dengan bacaan doa selamat dan rawatan Islam yang diketuai Perunding Perubatan Islam, Tuan Asmawi Tuan Umar.

Akhbar ini minggu lalu mendedahkan Zaidah hidup dalam timbunan sampah yang kali terakhir dikemas tujuh tahun lalu ekoran keadaan kesihatan tidak mengizinkan.

Berkongsi ceritanya dengan sekretariat PPIM, dia berterima kasih mana-mana pihak yang sudi mengemas rumah dan mengubati sakit dialaminya sejak sekian lama.

"Saya ucap terima kasih kepada semua yang membantu. Insha-Allah selepas



NADZIM (kiri) bersama sukarelawan yang membersihkan rumah Zaidah.

“ Ini kes contoh untuk mengambil tahu apa yang berlaku di sekeliling Nadzim ”

ini mudah-mudahan saya kembali sihat,” katanya.

Sementara itu Nadzim berkata, pihaknya bersyukur dapat membantu Zaidah dengan bantuan beberapa pihak lain yang memberikan kerjasama begitu baik.

Katanya, ia menjadi kes contoh kepada masyarakat di negara ini untuk mengambil tahu apa yang berlaku di sekeliling dan tidak hanya mementingkan diri sendiri.

"Alhamdulillah, kami dapat membantu sedaya yang mungkin. PPIM tidak bersendirian kerana ramai yang memberikan bantuan. Selepas ini kita akan tengok apa tindakan seterusnya," katanya.



LAPORAN Harian Metro 30 September lalu.



KEADAAN rumah Zaidah ketika proses pembersihan dijalankan.



Gembira ramai rakan membantu

Ampang: "Ingatan dia masih baik. Dia kenal rakan yang datang hari ini (semalam). Kami gembira kerana ramai yang membantu," kata Rosniza Mohamad Rasol.

Dia bersama dua lagi rakan yang sama-sama menuntut di Universiti Teknologi MARA pada 1978 sehingga 1981 tidak menyangka dapat bersua kembali dengan Zaidah Mansur di rumahnya, semalam.

Katanya, dia mengetahui nasib menimpa Zaidah selepas membaca akhbar ini serta menonton televisyen minggu lalu terpanggil untuk menyertai gotong-royong membersihkan rumah rakannya.

"Sebenarnya kami sudah lama tidak jumpa, saya sendiri tidak ingat bila kali terakhir kami bertemu. Seingat saya, dia bertugas di Jabatan Penerangan di Angkasapuri sebelum

bersara beberapa tahun lalu.

"Dari segi umur, dia lebih tua, tetapi kami belajar bersama di Fakulti Sebaran Am (kini Komunikasi dan Pengajian Media) dan dia seorang yang pandai.

"Apabila kisahnya didedahkan Harian Metro dan TV3, saya terkejut. Jadi kami datang untuk mengetahui keadaannya dan alhamdulillah dia nampak baik dan menyambut kami dengan mesra," katanya ketika ditemui.



ROSNIZA